

ASO LUA, 18 OKETOPA 2016

Na tauaofia le Fono Aoaofa Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2016.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia nei Tualumaga ma galuega a le Fono Aoaofa Faitulafono.

E avea ia lenei avanoa taua ou te faatalofa atu ai ma le agaga faaaloalo i le paia ma le mamalu maua o sui usufono mamalu o lenei Palemene, malo le soifua, faafetai le lagi e mama i lenei taeao fou. Faafetai i le Atua aua o lele ua ao ma Tumua ae muliau Masealii Lona alofa ma Lona agalelei, o lea ua tatou fesilafai ai i magafetau soifua e pei o le fetalai ia Leutogitupaitea.

E momoli foi le faamalo ma le agaga faafetai i lau Afioga i le Taitai o le Malo lau Afioga i le Palemia ma le mamalu o le Kapeneta, ona o le feagai ai ma tiute o Fonotaga Faava o Malo sa outou toesea ai mai lo tatou atunuu. O lea ua Taumailelei e pei o le Igoaipu a Leuluaiailii, ua tatou Fetaiaimauuso e pei o le Igoaipu a Tauiliili.

Ou te faaaogaina foi lenei avanoa ou te faatalofa atu ai ma le agaga faaaloalo i le tapuaiga a Samoa. Samoa e, o oe lava o le aomamala. O ou paia ma ou mamalu ma ou sa, e tumau e oo i le faavavau, aua o Samoa ua uma ona tofi. Ua manatu le Fofoga Fetalai o le a taoto i le Usoga a Tumua ma Pule ma Faleupolu o Tofiga ou paia ma ou mamalu, aua o le latou faiva alofilima ma lo latou fatuaiga tausi, latou te tiu ma afifi e pei o le faiva i le matalaoa.

Ou te momoli foi le faamalo ma le agaga faafetai tele i Taitai o Ekalesia e fia aemaise o le Auaigaluega Totofi a le Atua, ua faamalo tatalo i le ao ma le po. O le upu moni, e manuia faiva ma tiute o le Malo, ona o la outou galuega tatalo, faafetai tele, ia faamanuia le Atua i la outou tapuaiga.

Mo le silafia e lenei Palemene, ua nofoia nei le nofoaga mo tagata lautele e sui auai o le Polokalame Faa-Palemene mo Iunivesite ma Aoga Matata Eeseese 2016. O i latou nei na filifilia mai i Iunivesite ma Aoga Matata Eeseese i totonu o le atunuu. O se avanoa lelei lenei e auai ai e molimauina le faagasologa o galuega fai a lo tatou Palemene. O foliga vaaia foi lea o le atunuu o tulaga lelei ma faiga manino faatemokarasi o le silafia ma auai ona tagata i galuega fai a le Palemene, latou te molimauina ma mataitu.

18 OKETOPA 2016**Saunoaga Faafeiloai a le Fofoga Fetalai**

O le uluai tausaga lenei ua faatino ai lenei faamoemoe taua mo Iunivesite ma Matata Eseese ó ma e uunaia i nei polokalame avanoa e mafai ai ona fai ni o latou sao i mataupu e tagofia e le Palemene, po o tonufai a le tatou atunuu ma le Malo.

E avea lou leo e fai ma sui o lenei Palemene a le atunuu, e faatalofa ma faafeiloai aloaia atu ai ia te outou i lenei taeao. Ia sagai ane ai o le tai ma ia faamanuia le Atua i la outou polokalame e pei ona faatulagaina i le aso, faafetai.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliaga i le Fono Aoaofa Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Totogifuapauina ma Tau Faaee Atu (Teuteuga Eseese) 2016.

TUUIINA ATU i lou nei Lima i lenei aso 13 Oketopa 2016.

(Sainia): Tui Atua Tupua Tamasese Efi
OLE AO O LE MALO.”

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Faitulafono mo le iloiloaina o Tulafono Tau Faaofi ua faaalua iinei:

18 OKETOPA 2016**Faasilasilaga mai le Taitai o le Maota**

1. Tulafono Tau Faaofi o Faaputuga Oa-Faavae Resitalaina 2016.
2. Tulafono Tau Faaofi o Teuteuga o le Tulafono o Mavaega 2016.
3. Tulafono Tau Faaofi o Teuteuga o le Tulafono o Faiga Faapaaga ma Faiga Faapaaga Faava o Malo ua Faatapulaaina 2016.

TUUIINA ATU i lenei aso 13 Oketopa i le tausaga 2016.

(Sainia): Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi
TAITAI O LE MAOTA.

TUUIINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. S.R. 2016/8, Tulafono o le Pulega o Faigafaiva 2016 ó Faasilasilaga o le Amata Faamamaluina.
2. P.P. 2016/2017 Nu. 73, Lipoti Faaletausaga a le Faalapotopotoga o Eleele a Samoa 2014-2015.
3. P.P. 2016/2017 Nu.74, Lipoti Faaletausaga a le Pulega o Felauaiga i le Lauelele 30 Iuni 2015.
4. P.P. 2016/2017 Nu. 75, Faamatalaga i Naunautaiga o Auaunaga a le Faalapotopotoga o Suesuega Faasaienisi a Samoa 2017-2020.
5. P.P. 2016/2017 Nu. 76, Lipoti Faaletausaga a le Ofisa o Fuainumera Faamuina Iulai 2014-Iuni 2015.
6. P.P. 2016/2017 Nu. 77, Faamatalaga o Sini Autu a le Faalapotopotoga Malosi Faaletise 2017-2020.
7. P.P. 2016/2017 Nu. 78, Lipoti Faaletausaga a le Matagaluega o Faatoaga ma Faigafaiva Iulai 2013-Iuni 2014.
8. P.P. 2016/2017 Nu. 79, Faamatalaga o Tala o Tupe a le Pulega o Petipetiga Tausaga Faaiuina 30 Iuni 2015.
9. P.P. 2016/2018 Nu. 80, Fuafuaga Autasi Matagaluega o Tupe 2016-2020.
10. P.P. 2016/2017 Nu. 81, Faamatalaga o Sini Autasi Kamupani o Pulega a le Faaputugatupe Teufaafaigaluega o Mavaega Tausi a Samoa 2017-2020.
11. P.P. 2016/2017 Nu. 82, Lipoti Faaletausaga Matagaluega o Tupe 2014-2015.
12. P.P. 2016/2017 Nu. 83, Lipoti i le Polokalame Faufautua a Sui Usufono Tamaitai o Palemene o le Pasefika ma Malo o le Taupulega, Ueligitone Niu Sila, 28 Iuni-1 Iulai 2016.

Tuina atu o Pepa

13. P.P. 2016/2017 Nu. 84, Faamatalaga o Sini Autu o le Fuafuaga Autasi a le Pulega o Faailoga ma Tusi Pasi Taualoa a Samoa 2017-2020.
14. P.P. 2016/2017 Nu. 97, Faamatalaga o Sini Autasi a le Falemeli o Samoa 2017-2020.

TUUIINA ATU O LIPOTI A KOMITI FAA-PALEMENE

Na tolaulauina e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.51(5).

1. P.P. 2016/2017 Nu. 85, Lipoti a le Komiti o le Vaega o Atinae Eeseese i le P.P. 2016/2017 Nu. 8, Lipoti Faaletausaga a le Matagaluega o Galuega, Felauaiga ma Atinae Eeseese 2014-2015.
2. P.P. 2016/2017 Nu. 86, Lipoti a le Komiti o le Vaega o Atinae Eeseese i le P.P. 2016/2017 Nu. 12, Lipoti a le Pulega o Tinei Mu ma Faalavelave Tutupu Faafuasei 2014-2015.
3. P.P. 2016/2017 Nu. 87, Lipoti a le Komiti o le Vaega o Atinae Eeseese i le P.P. 2016/2017 Nu. 26, Lipoti Faaletausaga a le Pulega o le Suavai 2014-2015.
4. P.P. 2016/2017 Nu. 88, Lipoti a le Komiti o le Vaega o Atinae Eeseese i le P.P. 2016/2017 Nu. 38, Lipoti Faaletausaga a le Pulega o Malae Vaalele a Samoa 2015.
5. P.P. 2016/2017 Nu. 89, Lipoti a le Komiti o le Vaega o Atinae Eeseese i le P.P. 2016/2017 Nu. 47, Lipoti Faaletausaga a le Matagaluega o Punaoa Faanatura ma Siosiomaga 2014-2015.
6. P.P. 2016/2017 Nu. 91, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P. 2016/2017 Nu. 42, Lipoti Faaletausaga a le Ofisa o le Komesina o Sulufaiga 2014/2015.
7. P.P. 2016/2017 Nu. 93, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P. 2016/2017 Nu. 44, Lipoti Faaletausaga a le Komisi o le Toefuataiga o Tulafono a Samoa Iulai 2014-Iuni 2015.
8. P.P. 2016/2017 Nu. 95, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le P.P. 2016/2017 Nu. 46, Lipoti Faaletausaga a le Ofisa Tausi Mavaega a le Malo aso 30 Iuni 2015.
9. P.P. 2016/2017 Nu. 96, Lipoti a le Komiti o le Vaega o le Tamaoaiga i le S.R.2016/2, Tulafono Faatonutonu o le Faafoga o Lafoga (Tului o Lafoga Tuai ona Totogi) 2015.
10. P.P. 2016/2017 Nu. 98, Lipoti a le Komiti o le Vaega o Atinae Eeseese i le P.P. 2016/2017 Nu. 15, Lipoti Faaletausaga a le Pulega o Felauaiga i le Laueleele 1 Iulai 2013-30 Iuni 2014.

18 OKETOPA 2016

**LAFO A TAITAIFONO O KOMITI FAA-PALEMENE
TULAFONO TUMAU 52**

Afioga LEANA RONNIE POSINI (Sui Taitaifono): Lau Afioga i le Fofoga Fetalai, e faatalofa atu i lau Afioga i lenei taeao. E auai faatasi foi ma lau Afioga i le faafetai na e siitia i lenei taeao. E faatalofa atu foi i lau Afioga i le Taitai o le Malo, lau Afioga i le Palemia ma lau Kapeneta, le afifio foi o Minisita Lagolago aemaise o sui usufono o le Palemene o Samoa.

E faatalofa atu foi i Faauluuluga o Matagaluega a lo tatou Malo, aemaise foi o alo o Iunivesite ma Aoga Matata Eseea ua mafai ona tatou faatasi i lenei taeao, aemaise foi o le tapuaiga a Samoa, e faatalofa atu i la outou tapuaiga, e manuia ai faiva o le Palemene o Samoa.

Lau Afioga i le Fofoga Fetalai, ua ou tulai e faatu le lafo, *Ina ia tuuina mai e le Fono Aoa se faatagaga e faaopoopo ai ia le taimi e iloiloaina ai le Tulafono Tau Faaofi ua tuuina mai i lenei Komiti ma lipoti mai i le Fono Aoa i le Fonotaga ia Tesema 2016, ma le agaga faaloalo.*

Faaluaina mai e se tasi o sui usufono mo Falealili Sisifo, Tofa Aumua Isaia Lameko.

Na faamaonia le lafo.

FOFOGA FETALAI: Ou te tapa le Afioga i le Taitaifono o le Komiti Suesue Faapitoa i Mataupu Tau Faamasinoga o Fanua ma Suafa, lau Afioga i le Taitaifono.

Tofa LOPAO NATANIELU MUA (Taitaifono Komiti Suesue Faapitoa i Mataupu Tau Faamasinoga o Fanua ma Suafa): Lau Afioga i le Fofoga Fetalai e faapena foi ona faatalofa atu i lau Afioga i lenei taeao fou, e faatalofa atu foi i lau Afioga i le Palemia o le Taitai o le Maota, faapea le mamalu o le Kapeneta, Minisita Lagolago ma sui usufono o lenei Maota. E faatalofa atu foi i le tapuaiga mau a Lana Afioga Mamalu, O Le Ao o le Malo faapea foi le Masiifo, Afioga i Sui o le Fono a Sui Tofia ma a latou Masiifo. E faatalofa atu foi i Faauluuluga o Matagaluega ua mafai ona tatou aofia i lenei taeao, faapea foi le Susuga i le Failautusi o le Fono ma le mamalu o le ofisa.

E faatalofa atu lava isi o matou itumalo Asau i Vaisala, i le afio o le Tapaau ma le Gafa, Tama Taulauniu ma Safune faapea le afio i le Aloalii, Tapu ma Lealiifano ma le Toalima, faapea foi le paia mauuluga i Aiga ma Salafai Tufuga ma Masoe, faatualalua le Faasina ma Siuafanua, faapea foi le Afaigaluega galulue i lo matou itumalo, malo le soifua, malo le tapuai.

Lau Afioga i le Fofoga Fetalai ou te faatu le lafo, *Ina ia tuuina mai se faatagaga a le Fono Aoa e faaauau ai Iloiloga a le Komiti Suesue Faa-Palemene mo Fanua ma Suafa, seia aulia le masina o Tesema 2016, ona e le i maea atoatoa ana suesuega.*

Faaluaina e le Sui Fofoga Fetalai.

Na faamaonia le lafo.

18 OKETOPA 2016**TULAFONO TAU FAAOFI O TOTOGIFUAPAUINA MA TAU
FAAEE ATU (TEUTEUGA ESEESE) 2016 – faitauga muamua**

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Totogifuapauina ma Tau Faaee Atu (Teuteuga Eseese) 2016 i lona faitauga muamua.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

LAFO MO LE FAATAATIAESE O TULAFONO TUMAU 101(1)

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA DR. SAILELE MALIELEGAOI (Palemia): Lau Afioga i le Fofoga i le Fofoga Fetalai, ou te tulai atu e faatu le lafo, *Ina ia faataatiaese nei Tulafono Tumaui 101(1) ina ia avanoa ai le faitauga faalua o le Tulafono Tau Faaofi lea sa faitauina muamua i lenei taeao.*

Faaluaina e le Minisita mo Galuega, Felauaiga ma Atinae Eseese ma le Minisita mo Leoleo, Auaunaga o Tineimu ma Faalavelave Tutupu Faafuasei.

Na faamaonia le lafo ma tulai ai Tulafono Tumaui 101(1) ua faataatiaese.

**TULAFONO TAU FAAOFI O TOTOGIFUAPAUINA MA TAU
FAAEE ATU (TEUTEUGA ESEESE) 2016 – faitauga faalua**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Totogifuapauina ma Tau Faaee Atu (Teuteuga Eseese) 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Tupe Maua, Minisita mo Faamasinoga ma Pulega Tau Faamasinoga, ma le Minisita mo Tina ma Tamaitai, Atinae o Nuu, Afioga ma Agafesootai.

Afioga Hon SILI EPA TUIOTI: Faafetai i lau Afioga i le Fofoga Fetalai faapea le mamalu o le tatou Palemene. Ua taumafai le Tulafono Tau Faaofi lenei ina ia teuteuina le tele o Tulafono a le Palemene, o lo o faasino lea i le Totogifuapauina ma Tau Faaee Atu mo auaunaga a le Malo e ese mai lafoga e masani ai, e pei o tiue o oloa, o le VAGST, o lafoga i tupe maua, ma ia aloaia ai le Faaiuga a le Kapeneta o le FK 1425 o le aso 16 Iulai 2014.

**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

O le faamoemoe autu o le Tulafono Tau Faaofi lenei, ia faamautuina ai e faapea, o Totogifuapauina ma Tau Faaee Atu mo auaunaga uma a le Malo a Matagaluega a le Malo, Lala Sooupu a le Malo, Faalapotopotoga tau Faamanuiaga a le Malo ma Faalapotopotoga Tumaoti a le Malo, e ao ona faatonuina e Tulafono Faatonutonu e faia e Le Ao o le Malo, i le noatia ma le fai fuafua i le faamaoniga a le Komiti o Tupe Maua o le National Revenue Board, faapea le Tulafono o Pulega o Tupe a le Malo 2011.

O lenei Tulafono e tusa e 41 tulafono eeseese a le Palemene o lea o le a toe teuteuina ina ia faapena ona laugatasia ia faiga faavae e fua i ai le fetuunaiga o taufuapauina i auaunaga a le Malo e mai i Matagaluega eeseese. O lo o i ai foi a tatou tulafono sa pasia ae le i faia le Tutoatasi, ua oo i le tulaga ua tataua ona toe iloiloaina, atonu o se galuega lea e i ai se taimi e toe iloiloaina ai nei tulafono ina ia faapena ona toe faaleleia e tusa ai ma le siosiomaga ua tatou i ai i lenei vaitaimi. A o le agaga lava o le Tulafono lenei lau Afioga i le Fofoga Fetalai, o le tulaga lea o le toefetuunaiga ma le toe teuteuina o Tulafono ia, ina ia mafai ona laugatasia ia le faiga faavae e fuafua i ai le tau e tuuina atu e Matagaluega i auaunaga o lo o fai e Matagaluega eeseese ó ma o le faagasologa o ia galuega e amatamea lava ia Matagaluega e tataua ona toe iloiloaina ia latou totogifuapauina o latou auaunaga, ona ave lea e latou ia le fautuaga i le Komiti lea o le National Revenue Board, o latou e toe faia le suesuega i le talafeagai po o le l talafeagai, ona tuuina atu ai lea o fautuaga a le National Revenue Board i le Kapeneta, o le Kapeneta e i ai le Faaiuga mulimuli, ona faatoa avatu loa lea i Lana Afioga Mamalu, O Le Ao o le Malo aua le faamaonia, ona amata loa lea ona faatino ia ni suiga talafeagai ai e tataua ona fai i nei totogifuapauina.

Lau Afioga ma le mamalu o le tatou Palemene i lenei taeao, ua uma ona tapenaina e le Matagaluega o Tupe e fai ma sui o le National Revenue Board ia fetuunaiga, ma ua amata foi ua uma ona tapena ia tulafono, ae manaomia ona pasia e le Palemene ia le Tulafono Tau Faaofi lea ina ia amata ai loa ona faatinoaina. O lo o manino ia le Tulafono, o le tulaga ia o le tele o Matagaluega eeseese ma tulafono i ai, ua tataua lava ona oo i le tulaga ua tataua ona faalaugatasia ai ia le fuafuaina o nei totogifuapauina, ina ia fua foi i le auaunaga o lo o avatu, i le lelei o le auaunaga o lo o tuuina atu e Matagaluega. Ma o lea o le faapuupuu atu lea i lau Afioga ma le mamalu o le Palemene ia le manatu autu o lenei Tulafono Tau Faaofi ma sa faapea foi ona talanoaina i le tatou Semina i le aso ananafi na faamalamalama ai nisi foi o fesili sa fesiligia ai e nisi o sui usufono.

O le faamatalaga puupuu lea lau Afioga e faamalamalama atili atu ai ia lenei Tulafono Tau Faaofi. Ma le faaloalo lava.

FOFOGA FETALAI: Malo faafetai. E maitau atu talu ai ona o lea sa manino le faamalamalama i le aso foi ananafi a i latou sa...O lea o lo o i ai le sui usufono lea e tulai mai e fia saunoa. Tulai mai le sui usufono mo Saleaga Sasae.

18 OKETOPA 2016**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

Tofa OLO FITI AFOA VAAI (Salega Sasae): Faafetai i lau Afioga i le Fofoga Fetalai mo le avanoa. Masalo sa i ai nai tuatuagia i le aso ananafi ae i ai nai vaega ia e fia malamalama ai.

Lau Afioga i le Fofoga Fetalai, e momoli atu le faafetai tele i le Afioga i le Minisita, i nai ia foi faiga fou o le a agai i ai ia le tulaga o le faatulagaga o tau faaee, aemaise lava i auunaga i totonu o le tatou Malo.

O le mea muamua lau Afioga i le Fofoga Fetalai, o lea e aumai ma faaalua mai ia le tulaga o le Faaiuga a le Kapeneta, o lo o refer i ai ia le auga ma le faamoemoe o le Tulafono, peitai, e leai lava ma se isi o matou e malamalama i le Faaiuga lea a le Kapeneta, maimau e, pe ana faapea e matou te malamalama i le vaega lea, ona faufau ai lea o ni o matou manatu ma finagalo o sui usufono mamalu i le faamoemoe autu o le Tulafono Tau Faaofi. Ae ui o lea, o le a taumafai atu pea ia nai vaivaiga o lena itumalo.

Sa ou manatu lava o lea....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Malie le sui usufono, se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: I le Paeaiga talu ai, sa faatoa amata ai le faiga fou lea o le valaau atu o sui ae omai ia latou foi o Faauluuluga o Matagaluega, Loia Sili, Ofisa o le Loia Sili e faamalamalama Tulafono. O le mea la lena o lea ua tele ai ina malamalama ma leai ai ni tulaga foi lea e vevesi ai le tatou Maota. O lea foi e maitau atu i le sui usufono, na tomua ana upu i le mafai ona auai i le aso ananafi. Ia o lona le auai lea, o lea ua mafua ai ona agai mai ia lona finagalo sa tataua ona aumai mea ia ina ia malamalama ai. E le mafai ona malamalama pe afai e filifili e le itumalo se sui usufono e sau e faatino ona tiute faafaipule ae tiai fono. O lea o le a tauau ina toe faamalamalama uma ai lava mea, se i faamalie le loto o le sui usufono ona o le tiai fono ma le l sau e tusa o le valaau atu. A o le faamalamalama lea e matua maioio ai ma o le avanoa foi lea e fai ai fesili. Ia pei na ona ou faamalamalama atu o le tulaga lea leaga o le aumaiga lea aumai, pei ua i ai sina faaletonu o le mataupu lea ua avatu e le Minisita, ona ua le avatua mafuaaga o lea mea ma lea mea. Na ona ou faamanatu atu, e le i faimea tuulafoai le Minisita ma le Matagaluega a tatou o le Palemene, o lea e tuu avanoa ia i tatou uma e faamalamalama le mafuaaga o lea Tulafono ma lea Tulafono. Lau Afioga i le Fofoga Fetalai, se o mea tuai lava ia e sau ai le sui usufono. Ua fou le lalolagi lea tatou te i ai. Ma o lou tu ae lava i luga e aumai au mea tuai, ia matou te tutu atu foi e tau faatonutonu.

FOFOGA FETALAI: Masalo ua maua mai e le sui usufono.

18 OKETOPA 2016**Tulafono Tau Faaofi o Totogifuapauina ma Tau Faaee Atu
(Teuteuga Eseeese) 2016 – faitauga faalua**

Tofa OLO FITI AFOA VAAI: Lau Afioga i le Fofoga Fetalai, e manino lava le Tulafono Tumau o le Maota. A uma le faitauga faalua, ona avatu lea o ni manatu ma ni finagalo o Afioga i sui usufono mamalu o le Palemene. Sa ou tiai semina, ae ou te le i tiai fono o lea ou te i i le fono i le taimi lenei.

Lau Afioga i le Fofoga Fetalai, sa fa ita lava auí .

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, se i faasao lava le mea lea. E te fiu lava e te lalafi solo i lalo o au upu. Na tomua mai lava lau lauga i lou faase mai, maimau e pe ana aumai mea ia. A o lea sa avatu ananafi i le tatou fonotaga lea sa fai e faamalamalama ai Tulafono. A na faapea e te tulai mai lava ma e faapea mai, ia ona o au lea sa ou le auai ananafi na faamalamalama ai mea ia, na o si au tamai fesili lava lea. Ae tomua mai lava i lou faitio i le l avatua o mea ia, a o lea na avatu ananafi.

FOFOGA FETALAI: Ou te talosagaina le sui usufono mamalu ia logosaia foi se fautuaga a le Malo. Sa tatou semina ananafi ia sa aupito sililav a ona fefeu ma faigata fesili a le sui usufono lea, ae pei ou te tau atu, pei o le tulaga lena i Tulafono ia mulimuli e tolu ia e mulimuli mai, ae ua fai si ou tuai atu e te le i maua atu le Tulafono lea. Ae ui i lea, ia o lea o le a aliali i luma aua o galuega uma e lavea faasui usufono o le Palemene, o le semina ma mea uma lava na i lalo o tatou tiute. Ia ae malie ia o lea foi e ave i Komiti le Tulafono e talanoa ai pe a faapea o le a se finagalo a le Malo.

Tofa OLO FITI AFOA VAAI: Faafetai i lau Afioga i le Fofoga Fetalai. Leai ua ala ona tau avatu se manatu ona e le avea i le Komiti tatou Tulafono aua o lea ua faanatinati le tatou Tulafono. Ae ui i lea lau Afioga i le Fofoga Fetalai ou te usitai i le faatonuga a lau Afioga.

O tau faaee ia o lea e mulimuli mai ia tatou Regulations po o Tulafono Faatonutonu e manino mai ai po o a tau faaee o le a avatu i lea auaunaga ma lea auaunaga i le Matagaluega. Ia o le mea lea e faanoanoa ai le mafaufau lau Afioga i le Fofoga Fetalai, na o le 12 lava sui usufono o le Maota lea latou te iloiloia mea ia, e aunoa ma se silasila iai o le 38 o sui usufono mamalu o itumalo, pe o sao ma talafeagai mo le soifuaga i le taimi lenei o le atunuu. E ui lava ina ave i Regulations, ia ae masalo e uma foi le 5 tausaga faatoa oo mai ia Regulations na mo le pasiaina e le Maota.

Lau Afioga o le isi vaega, sa ou faapea lava au o lea e i ai le tatou Tulafono foi lea o le Regulator....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai o se mea e fia faasao, e le atoa se 5 tausaga ona faatoa aumai lea o mea ia o Regulations, o lea e faitau uma lava mea na pe a tatou fono i fonotaga uma lava.

18 OKETOPA 2016**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

Ae o le molimoli mai e oe o le tulaga lea e tai lima (5) tausaga faatoa aumai, o se mea e sese tele lea mau e te aumaia. O lea e faamaonia e tatou te fono loa, o le isi lea vaega tatou te faalogologo ae talau mai talau mai talau mai talau mai ia Regulations. E leai la se mea e faatali ai fua i le lima tausaga, ma o le avanoa foi lena e maua ai le avanoa o sui usufono e saunoa ai i saunoaga faalauaitete.

FOFOGA FETALAI: Ia faaiu mai le saunoaga a le sui usufono.

Tofa OLO FITI AFOA VAAI: Toe lua lava nai vaega ia e fia oo atu i ai se lagona vaivai lau Afioga i le Fofoga Fetalai. O lea ua ou tilotilo atu i le tofiaina o le National Revenue Board e gafa ma le vaega lea, ou te iloa foi la o Afioga i Faauluuluga o Matagaluega o le a tofia, a o le tele ia o tiute o ia foi tamalii o lo o galulue ai. A o lea e iai le tatou Ofisa foi lea o le Regulator, o lea tatou te talanoa i tau faaee i totonu o Regulations .A la e i ai le tatou Regulator ae faaopoopo i ai se Division e agavaa lelei i mea ia ona faatulaga mai lea i ina, o lea foi ua iai uma lava tau faaee o le EPC, o le Vai, ae tuufaatasi i se vaega se tasi. A o le mea lea ua ou vaai atu nei i ai, o le a faasapasui ma alu solo faapenei mea uma ma nenenfu ai ma le atunuufi .

FOFOGA FETALAI: Ia se i tulai mai le Afioga i le Minisita e ana le Tulafono.

Afioga Hon Sili Epa Tuioti: Lau Afioga i le Fofoga Fetalai o le mea e fia faasao ma faamalamalama.

Lau Afioga i le Fofoga Fetalai, ua leva ona faatu le National Revenue Board, masalo na faatu lava le Komiti lenei o lo o ou i ai i le Ofisa o Tupe, o lo o i ai ia le Pule Sili o le Matagaluega o Tupe, Matagaluega Tupe Maua, Ofisa o le Loia Sili faapea le Pule Sili o le Matagaluega o le Commerce and Industry. E mafai foi ona auai ai ma nisi sui i le talitonuga o le Komiti e tataua ona o atu e fesoasoani i le tapenaina o galuega nei. O le Regulator o lo o iai nei e faapitoa lava i tulaga ia o le EPC ia ma le tulaga lea o telecommunications. I le taimi lenei i le talitonuga a le Malo o lo o lelei, lafo mai pea na o mea ia e le o ni tulaga foi ia ni lafoga, o totogi o auunaga ia a Matagaluega pei o le faiga o pepa fanau ma tulaga faapena. A o le Regulator ia o le tulaga o lo o i ai ia competition i totonu o Kamupani o lo o faia ia auuanga ia tau tekonolosi ma tulaga faapena, o lo o ua faapitoa lava i ai le auunaga a le Ofisa o le Regulator. A o le tulaga ia i le Revenue Board, ua talafeagai lava le faatuina ma tuu atu ia i latou. E pei lava ona ou taua, e amata mea ia Matagaluega ma Faalapotopotoga i tulaga pe a manao e toe teuteuina ia latou totogi nei, ona fai lea o le iloiloga a le Revenue Board po o ua talafeagai pe a fua i le tulaga o le tau o lo o faaalu ai i auunaga nei, ia ona ave ai lea i le Kapeneta. Ou te talitonu e taua le galuega a le Regulator, ia ae o lo o ua fetai lava i le tulaga lea o le tau o le eletise ma le tulaga lena o tatou telecommunications, faafetai.

18 OKETOPA 2016

**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

Tofa OLO FITI AFOA VAAI: Lau Afioga i le Fofoga Fetalai, e faafetai atu i le Afioga i le Minisita. Na pau lava le tulaga na avatu ai se lagona, o le tuufaatasi o mea e fausia mai ai ia tulaga ia pei o tau faaee atu. Ia ae aua ne i tetena i lou finagalo lau Afioga na o nai manatu lava e tuuina atu, ia ae pule lava lau Afioga i le Minisita ma le faatulagaga. Ae pau lena, se i faaoga mai ai foi nisi o lo o toatele alo ma fanau a le atunuu o lo o ua agavaa lelei i le tulaga lea, i lo i le toe tofia mai foi o afioga i Faauluuluga o Matagaluega o la eí .

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o le manatu lea e tuufaatasi, sa i ai le fuafuaga e ese lava le Regulator e faatulagaina ia tau o mea ia o fesootaiga televavave, ese le Regulator e faatulagaina tau o mea tau eletise. Ia ona fai ai lea o le fuafuaga a le Malo e tuufaatasi mea ia e leai se mea e tuu eseese ai. Ae a oo loa la i le tuufaatasiga o mea ia o totogifuapauina, ia o lena ua tilotilo i ai i le lisi, o le matua tele lava o le lisi e aofia uma ai lava Matagaluega a le Malo. O tagata foi e muamua atu ae le i faatuina ia le Komiti lea tau tupe revenue, sa faia lava e le Matagaluega ia latou iloiloga o siitaga, ona omai loa lea o le Matagaluega o Tupe e toe siaki atoa mea na. O lea la na mafua ai ona faatu le manatu lea e faalatele nai lo le Matagaluega o Tupe. Na faatu le Board lea i le 28 tausaga talu ai, a o lea ou te Minisita o Tupe, o leal ana faatu ai a o tulai mai ia Sili o le Faauluuluga o le Matagaluega o Tupe. O lea la na faatu ai le mea lea e tau talatala atu i tua ia sui auai e aumai uma ai i latou o lauia o mea tau tupe e latou te toe siakiina uma ia galuega nei na fai, nai lo le tuu tasi na o le Matagaluega o Tupe. O lea la ua lautele atu le mea lea ua i ai nei, ma o lauia tagata ia ua i ai i totonu o le Komiti lea. E le o se Komiti faatoa faatu ananafi, ua 28 tausaga ia le umi. Ia o le faaopoopoga atu lena.

FOFOGA FETALAI: Malo saunoa, ia tulai maia le sui usufono e faamaea mai lau saunoaga.

Tofa OLO FITI AFOA VAAI: Ia ona faauma atu ai lea lau Afioga. Na o le pau le fautuaga i lau Afioga i le Minisita, ia afai o lea ua toe teuteu a tatou tau faaee, ia tautuana ma lau Afioga i le tulaga ona o lea e le i leva atu nei foi ona tasi isi tatou tau e i ai le LTA ma mea faapena tai 100%, se i silasila totoa i ai lau Afioga, ona e tele le aafiaga o tagata taitoatasi o le atunuu pe afai e sii ia ni tau fuapau mo tele o auunaga a le Malo, faafetai i lau Afioga mo le avanoa.

FOFOGA FETALAI: Malo faafetai. Masalo ona o lea sa mamafai ai le tatouí .Ia se i tulai mai le sui usufono mamalu mo Anoamaa Sisifo, lau tofa i le matua Lauofo.

**Tulafono Tau Faaofi o Totogifuapauina ma Tau Faaee Atu
(Teuteuga Eseese) 2016 – faitauga faalua**

Tofa Hon LAUOFO FONOTOE NUA FESILI PIERRE LAUOFO (Anoamaa Sisifo): Lau Afioga i le Fofoga Fetalai e faafetai atu mo le avanoa, ou te manatu o le faafetai lava ma le viiga i lenei taeao ua maea ona e siitia e le faaitiitia i sa matou gagana. O lea la ua maea ona e faalanu paia o le lagi, ua e faafeiloai foi le Maota Fono ma Samoa, ia o lena ua e paniniu paia o le atunuu, e le toe oo la i ai sa matou faamatalaga. Ae agai tonu se manatu e tusa ai ma le Tulafono Tau Faaofi ua opea i le Maota.

O le mea muamua faafetai i se taumafaiga fou ua aumai ina ia i ai se Komiti po o se itutino o le tatou Malo o le a gafa ma le fuafuaina o tatou totogifuapau po o tau faaee i auaunaga a le tatou Malo. Aua e matauina e lou sui usufono, ua tele le tulaga foi lea o le siitia o le tau o le faatinoga o auaunaga a le Malo i lenei vaitau, ua faalagolago lea i tulaga faatekonolosi i neionapo ia ae faapea foi mea o lo o faaaga e faatino ai auaunaga. A o nisi o nei totogifuapau po o tau faaee, ua tausaga e le i sii i luga ia o latou totogi po o tau faaee. O lona uiga, i lou talitonuga e tatau foi ona i ai se tulaga faapena e siisii i luga i se tau talafeagai ma se tau gafatia ina ia faapena ona talafeagai ma le tau ma tupe o lo o faaalu e faatino ai auaunaga a le Malo. A o nei foi totogi po o tau faaee, pe afai o le faamoemoe lea pei ona saunoa le Afioga i le Minisita o Tupe,

o lo o mulimuli mai i Tulafono Faatonutonu, e faapena ona fua ma siisii ai i luga ia tau o nei totogi po o tau faaee. Ia fuafua foi i le matou fautuaga, ia tulaga i le tau o le soifuaga ua i ai nei. E pei foi ona malie i le saunoaga a le tootoo ua mavae atu nei. O le mea la lea ou te lagolagoina ai le tulaga lea o le Revenue Board, ia gafa latou ma le faatinoga o le matafaioi leni, e fuafua lelei ai ia le siitaga o totogi ma tau faaee mai i lea taimi, i lea taimi, i lea taimi mo le agai i luma. E fua foi i le tulaga o tupe o lo o faaalu i le faatinoga o nei auaunaga.

O lona uiga o se faamatalaga e pei ni tulaga foi lele mo mea o cost recovery o le Malo. Aua o nei totogi, ia e le o ni totogi tele po o ni tau faaee tetele e faapea e matua saili ai ni tupe se tele a le Malo, a o se tau fuafua ia talafeagai ma le gafatia, o tulaga ia e fuafua i ai. O lona uiga, aua o le mea sa sau ai i lau maitau, ia e eseese e pei e eseese foi taimi e sii ai ia totogi ma tau o lea Matagaluega mai i le isi Matagaluega i le isi Matagaluega. A o se tuufaatasiga faapenei, ina ia tasi lava le Komiti e silasila ma fuafua lelei, ou te manatu o se tulaga lelei. O lona uiga e coordinate i le tulaga o le faatulagaga o tatou totogi, tau ma tau faaee ma consolidate faatasi uma. O le mea lena pei e tau atagia mai le Tulafono Tau Faaofi leni le consolidation lea ua aumai. O se tulaga la e fuafua i ai i le agai i luma, o se tulaga lelei e pei ona ou fai atu i lau Afioga i le Fofoga Fetalai, ae pau lava na o se matou fautuaga o leni itumalo, e silasila ma faataoto se alafua po o se formula e fuafua i ai siitaga mai lea taimi, i lea taimi i lea taimi ina ia mafai ona ogatusa ma laugatasia i le agai i luma.

Lau Afioga i le Fofoga Fetalai, ia na o se manatu puupuu lena e lagoalagoina ai le Tulafono Tau Faaofi e pei ona aumai e le Afioga i le Minisita o Tupe. Faafetai mo le avanoa.

18 OKETOPA 2016

**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

FOFOGA FETALAI: Malo Faafetai. Ia ua maitau atu ua maea sui usufono e fia saunoa. Ia masalo la toe pau ia o sui usufono. Se i tulai mai po o ai sui usufono e fia saunoa e lelei lena e fua i ai....ia toe o le sui usufono lea, lua i le sui usufono mo Faleata Sisifo, ia faapena foi Faleata Tu Taulaga. Ia saunoa lau Afioga i le sui usufono mo Nuu Tu Taulaga i Sisifo

Afioga FAUMUINA ASI PAULI WAYNE FONG: (Nuu Tu Taulaga i Sisifo): E momoli tele atu le faafetai i lenei taeao i lau Afioga, ona o se avanoa foi ua mafai ona maua e faaleo atu ai se manatu i le tulaga i lenei Tulafono Tau Faaofi. Sa ou i ai ananafi i le tatou faatalanoaga, malamalama lelei lenei sui usufono, e lagolagoina foi Tulafono Tau Faaofi. Ae i ai fautuaga sa taumafai atu i ai, ae se paga na o le toalua Minisita na auai atu ananafi, e le i i ai foi le tele o sui o Matagaluega taitasi o lo o aafia. Ae na o se fautuaga vaivai e avatu ina ia silasila totoa ia faalapotopotoga foi i tulaga o le siitia o tau faaee aemaise lava ia le Ofisa o Uafu ma le Ofisa o Tiute, o latou ia o lo o aafia i le tau o le oloa o lo o aumai i totonu o Samoa. O lea ua uma ona i ai tau faaee ia ua i ai, ae a faapea ua i ai se suiga, ia sui ifo i lalo faataugofie, ae tuu i luga lesi vaega na e le i maua lava ni a latou tau faaee. Aua silasila lau Afioga, a aafia i tau o oloa, ia o le a siitia ai foi ma le tau o le soifuaga. Ona avatu ai laia o se fautuaga ina ia silasila ma tagai lelei. Manaia le faaupuga na aumai ananafi, o le a fai se fuafuaga lelei a Matagaluega ia aua foi le lelei o le tau faaee. O tau faaee nei ua leva ona i ai, ae suisui mai lava i lea taimi i lea taimi, ae ua manaia le Tulafono lea ua i ai o le a faatulafono ai loa ia ma tatalo atu, a i ai se taimi faaoo mai i le Palemene nei se i tagai ai foi le mamalu o le Palemene i tau faaee fou o le a faatulaga, ina ia fai se manatu i ai ia aua foi le agai i luma.

Ia ma le faaaloalo lava lau Afioga, faafetai mo le avanoa.

FOFOGA FETALAI: Malo Faafetai. Ia se i tulai mai ia le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa, e faatalofa atu foi i le paia o le Palemene aemaise le faafofogaaga a Samoa.

O le ala o le tulai i le tatou Tulafono, o lea ua agai le tatou Malo i le mea foi lea o le user pay system, e tataua lava ona leai se aia tataua e totogia mo le auaunaga faatino a le Malo e siitia ai le faatinoina o tiute. E pei ona saunoa le Afioga i le Minisita o Tupe, o le siitaga e tataua ona atagia ai ua lelei le faatinoina o galuega ona e le augata lea e totogi le tupe faaopoopo. Pau o le mea lea ou te fia fesili ai, o le administer ina o Tulafono nei, e i ai nai vaega o le Tulafono o lea ou te fia fesiligia ai lau Afioga i le Minisita, ia o le tele o siitaga ia e fautua mai e fuafua i lalo i le Tulafono a le Public Finance Management Act, ou te le o malamalama la po o le a le mea e ala ai ona fua agai i lea Tulafono. Manatua ua tofua lava ia Matagaluega a le Malo ma a latou Tulafono.

**Tulafono Tau Faaofi o Totogifuapauina ma Tau Faaee Atu
(Teuteuga Eeseese) 2016 – faitauga faalua**

O le mea lea e fia faaautu i ai le manatu a le vaega lea a le Regulator lea e faaeea tau faaopoopo i luga o le EPC ma isi vaega faapena, ou te talitonu o la ua uma ona taatia faiga faavae e fua agai i ai a latou tau, e fua i le suauu po o le energy o lo o faaoga, ia ma tau faaopopo faapena ona fai. A faapea la e uma ona fai latou suesuega ma faaee le tau, i lou talitonuga e le mafai ona fai fuafua le latou galuega e fua agai i le Public Finance Management Act, i lou lava lea talitonuga.

O le isi vaega, o tele o tau faaee lea i ai mai le tele o Tulafono Autu ia e i ai, o lo o tuu ai le malosiaga i lalo o le Minisita e faatino ai fautuaga mai le Matagaluega ona tuu atu lea i le Kapeneta mo le pasiaina, peitai o lea ua ou vaai atu ua toe sui uma agai i Lana Afioga Mamalu, O Le Ao o le Malo. Ia o le tasi lea vaega e fia fesiligia, pe o le a le mafuaaga ua toe shift ese ai, aveese ai le malosiaga lea ma sa faafaigofie ai le faatinoina o galuega ma o i latou tonu ia lea e gafa ma vaega o le faatinoina o le Tulafono, a o lea e foliga mai ua toe aveese mai e ave le fautuaga i Lana Afioga Mamalu, O Le Ao o le Malo e faau mai ai. Ia tailo i ai, aua o lea foi sa talanoaina i le tatou Paeaiga talu ai i le faiga o galuega lava nei a le Palemene, o lea ua i ai le malosiaga i le Malo e faatino ai lava galuega e tatau ona faatino faatelelevave aemaise mea faapea i tau faaopoopo ma mea faapea. O lo o faamamalu lava Le Ao o le Malo ia i mafuaaga tatau i mea e oo i ai, ia i ai lona ia.....A o mea ia tau i le administer ina o mea aemaise o tau faaee ma taimi e tatau ona fai ai, o lou talitonuga o lo o taatia e sagatonu ia tulafono o i ai, ina ia faaogaina ai le malosiaga o Minisita pe a uma ona tuu i ai fautuaga e faaee ai tau faaopopo nei. O le faaitaiga, pei la o le mea lea o school fees, aua o lea lava e pepese le atunuu ua le toe i ai ni school fees. O i ai la le malosiaga i lalo o le Minisita ona o lea ou te talitonu, sa i ai vaega e feteenai ai matua ma PTA ia mea ia faa....vaega ia o Komiti o Aoga, lea foi e faaee ai a latou tau, ona sulu mai loa lea o tagata nei i le Minisita ma le Matagaluega, pe i ai se latou fua faatatau e fua agai i ai tau faaopoopo a Komiti Faafae nei, aua pei e tuusaoloto lava latou e fai a latou tau faaopoopo ona toe tuuai foi lea i le Malo, o lea ua leai ni pili aoga ae o lea ua pei ua tetele atu ai mea ua faaee e Komiti nei. O le Minisita la, sa i ai le malosiaga e fetuutuunai ai tau talafeagai e fua i tupe ia e faaalu e Komiti nei mo aoga, peitai o lea ua toe aveese mai lalo ae tuu i lalo i le faitalia a Komiti, e pei o lau faitau lena i le Tulafono.

O nai vaega na e tatau ona fia malamalama ai lou sui usufono, i tulaga o tau faaopoopo nei. A o le isi mea e pei o le mea lea na taua, o le tau faaopoopo ia o le mea talafeagai aua e fua i le aluga o le soifuaga, ae e tele foi o nei tau, ua leva ona tatau ona sui, ia a oo ina sui mai, ua pei lea ua tetele tele ae ua tai 10 tausaga e le faaopoopoa. Ia, talu ai ona e tele nai mataupu ae le i uma ona faitau i le Tulafono Tau Faaofi. O nai vaega na e fesoasoani ai i lau Afioga i le tatou Tulafono.

Ma le faaaloalo lava.

**Tulafono Tau Faaofi o Totogifuapauina ma Tau Faaee Atu
(Teuteuga Eseese) 2016 – faitauga faalua**

FOFOGA FETALAI: Malo faafetai. Ia, o lo o tulai mai le sui usufono lea mo Falealili e fia saunoa, ia se i tuu atu pea le avanoa ae sa tatau ona aua le augata e tulai mai pe a ou fesili atu pe i ai ni sui usufono e fia saunoa ma tulai mai lea mo le faagasologa o le tatou galuega. Ia lelei le sui usufono, saunoa.

Tofa AUMUA ISAIA LAMEKO (Falealili Sisifo): Faafetai mo le avanoa i lenei taeao. Ua maea ona sii le viiga ma le faafetai i le Atua ua mafai ona tatou aulia mai lenei taeao i le alofa ma Lona agalelei.

E tulai atu ma le agaga faaaloalao tele, e fia faia se manatu e faatatau i lenei Tulafono Tau Faaofi. A tonu o lea ua maea foi ona tali a matou fesili e pei ona i ai le aso ananafi, ia ae ou te iloaina lava o lenei avanoa e faafetaia ai le Minista o Tupe ma le Matagaluega o Tupe e amata mai i le Paeaiga talu ai seia oo mai lenei itula, ona ua tausaga o tau tuufaatasia ia tulaga ia e faatatau i totogifuapauina ma tau faaee atu. I lou la talitonuga, e tele foi Tulafono ua pasia e le Palemene nei, ae pau lona, e leai ni Tulafono Faatonutonu, e faatonutonu ai ia togifuapauina ma le tau e faaee atu. Ae faafetai o lea ua oo mai le Tulafono lenei ina ia mafai ona tuufaatasia ai ma laugatasia ai, ae le gata foi i lea, e faataatia ai ma le alafua aua tatou totogifuapauina ma le tau e faaee atu i auaunaga eseese. O lea e tuuina atu ai ma le agaga faaaloalo le lagolagoina o lenei Tulafono Tau Faaofi, faafetai.

FOFOGA FETALAI: Malo faafetai. Masalo e pei o lea sa maua lelei i le aso ananafi. Aua e na ona faamanatu atu e le Nofoa, tulou i sala le gagana o le upu e foi mai i le Nofoa. O le mafuaaga lena e pei ona malele ma saunoa le Afioga i le Palemia o le tulei ina ia siitia i luga le tulaga manino o sui usufono i a tatou Tulafono ia faapena ona finagalo le Malo e pasia ma tuuina mai i le Fono Aoa ma le Palemene, o le ala lea e manatu ai e ao ona fai le tatou semina ae le i oo i le aso o le Palemene, ina ia faapupula ma faamalamalama ma faamanino Tulafono e i latou o e o lo o faapena ona o latou tusitusia ma aumaia le fautuaga i le Kapeneta. Ia e faamanatu atu, o lou le auai i a tatou semina, tasi lena toesea o le faatinoga o ou tiute faasui usufono, ioe, pei o le tulaga lena. Na ona faamanatu atu aua a oo la i le tatou taualumaga, ia ona toe taumafai foi lea e tauasa le ogasami lea sa asa i le aso atoa ananafi. Pei o le mafuaaga lena ina ia faafaigofie le tatou galuega, ia o le mafuaaga lea. E manatua foi na faamanino atu ananafi, o le matafaioi e le tuufaatasia matafaioi a le Palemene ma le Kapeneta. O le matafaioi lava a le Palemene ia, o le fausia o tatou Tulafono ia ona faasolo atu lea o galuega i le faataatia e le Malo i le Kapeneta ona fausia mai lea o tatou Tulafono Faatonutonu, ae toe oo mai foi i le Palemene. Ia e faapena ona tuuina atu i totonu i Komiti Filifilia ia ma aumai ai foi le fautuaga ia ma toe ave i totonu i le Malo e latou te tali mai i le 60 aso. O tulaga faagasolo lena o le tatou galuega e faafaigofie ai, ma e ou te faamanatu atu foi, e le ave lou finagalo e fai ma faapea o le finagalo na a le Malo, o lou lava lea manatu, i lou lava lea manatu toatasi i le mea e tatau ona i ai lou finagalo agai i le Tulafono.

18 OKETOPA 2016**Tulafono Tau Faaofi o Totogifuapauina ma Tau Faaee Atu
(Teuteuga Eseeese) 2016 – faitauga faalua**

A o le finagalo o le Malo, o le mea lena e fai ai. Ia ma lou faaaloalo, ona o lea ua maea ona saunoa le sui usufono mamalu i le tatou Tulafono. Ia o le a tuuina atu le fesili.

Ia sei toe tuuina atu i le Afioga i le Minisita pe i ai se isi mea e te fia saunoa i ai i mea sa laga mai e sui usufono mamalu, aua o lea lava ua... o le tulai mai lava o le finagalo ma faasao ma faamanino. Pe i ai se isi mea e te finagalo i ai ae le i tuuina atu le fesili.

Afioga Hon SILI EPA TUIOTI: Leai lau Afioga, na pau le mea e momoli atu le faafetai tele i sui usufono foi o le Palemene sa faapea ona tuuina mai fautuaga. Ia ua talia foi i le tulaga o le taua o le tuufaatasia.

O le taua o le tulaga foi lea e tatau ona vaavaai lelei i ai le Komiti lenei ina ia fua ni siitaga i le tulaga o le tamaoaiga o le tatou atunuu ma le tulaga e mafai ona gafatia e le lautele o le tatou atunuu ona totogiina. Ae o le mea taua lava o le tulaga i isi ia e pei o foliga mai e fai siitaga ona ua umi ona tuu siitaga. Ae o le tulaga o le a faatino ai nei e tatau lava ona fai ma iloilo ina pe tai lua tausaga ma tai lua tausaga ina ia faapena ona ogatasi ma tulaga o tupe a le Malo o faaalu nei i le faatinoina o nei auaunaga ae faapea foi le tulaga o le tamaoaiga ma le tulaga i le vaai pea lava i le gafatia e o tatou tagata o nisi o togipau, aemaise lava i vaega ia e taua ina ia faapena ona faafaigofie ia faataugofie foi ina ia faapena ona faaaoga e le lautele o le tatou atunuu. Ia o anava taua ia a le tatou Malo. E taua le galuega a le Komiti e pei foi ona faafetai i le lagolago mai a le Komiti lea a le Revenue Board, ia o le latou galuega lena. E le tuu foi lava i Matagaluega e pule mai latou, ae tatau ona iloilo ona aumai lea o le fautuaga a le Komiti i le Kapeneta i ni fetuunaiga talafeagai, ona o le faaiuga e fai e le Kapeneta.

E pei ona fesiligia le tulaga lea i Lana Afioga Mamalu, O Le Ao o le Malo, e pei ona masani ai i Regulation e pasia e le Kapeneta le faaiuga, ia ona ave lea e faatali le Assent a Lana Afioga Mamalu, O Le Ao o le Malo e pei ona i ai ona faatino ai loa lea o a tatou fuafuaga ia ua i ai nei. Ia ae masalo o lo o faafofoga mai foi Ofisa Sili o Pulega o Matagaluega sa taua, ia o le faanaunautaiga lava lena ina ia fai ma toe iloilo ma toe teuteu ina ia ogatasi ma a tatou fuafuaga i le agai i luma o le tatou atunuu, i le tulaga o le faatinoina o auaunaga aua a lelei le faatinoina o auaunaga, ia o le a faafaigofie foi ona talia ni fesiitaiga ina ia mafai ai ona toe faaola mai nisi o vaegatupe o faaaogaina i nei galuega.

Ae faafetai tele i lau Afioga i le Fofoga Fetalai faapea foi sui usufono mamalu o le Palemene sa saunoa.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Totogifuapauina ma Tau Faaee Atu (Teuteuga Eseeese) 2016 i lona faitauga faalua.

18 OKETOPA 2016**Lafu mo le Tagofiaina o Tulafono Tau Faaofi i le Tulaga Faanatinati**

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloaina ma toe lipoti mai ai i le Fono Aoa o le Fonotaga o Ianuari 2017.

LAFO MO LE TAGOFIAINA O TULAFONO TAU FAAOFI I LE TULAGA FAANATINATI

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA DR. SAILELE MALIELEGAOI: Lau Afioga i le Fofoga Fetalai e tusa ai ma le Tulafono Tumau 45(n), ou te faatu le lafo, *Ina ia tagofia e le Fono Aoa i se tulaga faanatinati Tulafono Tau Faaofi e 3 ia o le a faaofi nei ona o ni mafuaaga taua tele.*

Faaluaina e le Minisita mo Galuega, Felauaiga ma Atinae Eeseese ma le Minisita mo Leoleo ma Auaunaga tau Tinei Mu.

Na faamaonia le lafo.

TULAFONO TAU FAAOFI O FAAPUTUGA OA FAAVAE RESITALAINA 2016 – faitauga muamua

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Faaofi o Faaputuga Oa Faavae Resitalaina 2016 i lona faitauga muamua.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o Faaputuga Oa Faavae Resitalaina 2016 i lona faitauga muamua.

TULAFONO TAU FAAOFI O TEUTEUGA O LE TULAFONO O MAVAEGA TAUSI 2016 – faitauga muamua

Afioga Hon SILI EPA TUIOTI: Lau Afioga le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Mavaega Tausi 2016 i lona faitauga muamua.*

Faaluaina e le Minisita mo Faamasinoga ma Pulega tau Faamasinoga ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Mavaega Tausi 2016 i lona faitauga muamua.

18 OKETOPA 2016

**TULAFONO TAU FAAOFI O TEUTEUGA O LE TULAFONO O
FAIGA FAA PAAGA FAAVA O MALO MA FAIGA FAA PAAGA
FAATAPULAAINA 2016 – faitauga muamua**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Paaga Faatapulaaaina 2016 i lona faitauga muamua.*

Faaluaina e le Minisita mo Faamasinoga ma Pulega tau Faamasinoga ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Faa Paaga Faatapulaaaina 2016 i lona faitauga muamua.

**TULAFONO TAU FAAOFI O FAAPUTUGA OA FAAVAE
RESITALAINA 2016 – faitauga faalua**

Afioga Hon SILI EPA TUIOTI: Lau Afioga le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faaputuga Oa Faavae Faamauiina 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Tupe Maua, Minisita mo Faamasinoga ma Pulega tau Faamasinoga ma le Minisita mo Tina ma Tamaitai, Atinae o Nuu, Afioga ma Agafesootai.

Afioga Hon SILI EPA TUIOTI: Lau Afioga i le Fofoga Fetalai, o le Tulafono Tau Faaofi leni o Faaputuga Oa Faavae Resitalaina 2016 faatasi ai ma isi teuteuga o Tulafono Tau Faaofi o lo o mulimuli mai e lua, o se faiga lea ina ia faamalosi ai pea le mafai e le tatou Faalapotopotoga o mea tau tupe faavao Malo ina ia faaopoopo ana auaunaga e mafai ona ofoina atu i le tele o faipisinisi ma i latou o lo o tele latou tupe o lo o fia maua ni avanoa e faafaigaluegaina ai i atunuu i fafo. O le sini autu lava o le Tulafono Tau Faaofi o le mafai lea ona ausia o le manulauti a le SIFA, o le ave lea o Samoa ma atunuu lauiloa ma tulaga maua moomia i auaunaga tau tupe ma pisinisi lava faava o Malo. O le fuafuaga ina ia mautinoa pea le tulaga alualu i luma ma le faaauu pea o galuega a le SIFA, e tatau ai ona fausia pea Tulafono fou e ofoina atu ai auaunaga eseese ia i latou o lo o sailia nei auaunaga mo le teufaifaigaluegaina o a latou tupe ma a latou aseta, ma faamautinoa ai le umia pea e i latou o le pule o a latou lava pisinisi, e faatosina mai ai ma isi tagata faipisinisi aemaise lava tagata mauoa po o e maoae o latou tulaga tau tamaoaiga ma isi mafuaaga faapena.

Ma o le mafuaaga lea o le Tulafono fou ina ia ofoina atu ituaiga auaunaga ma faatuputupulaia ai foi le maoae o auaunaga i pisinisi faia faa Malo ua mafai ona ofoina atu e le tatou Faalapotopotoga.

**Tulafono Tau Faaofi o Faaputuga Oa Faavae Resitalaina 2016
– faitauga faalua**

Lau Afioga, o nisi o itu taua o lenei Tulafono Tau Faaofi o le tofiaina lea ma le aveeseina mai o sui tau o le Fono, o se tagata e vaavaaia ma le tagata e puipuia aia, ma faapea ona faamatalaina ai tiute ma malosiaga o le faamasinoga e faatatau i se faaputugatupe ua faavae. Ia faapea foi ma le resitalaina o faaputuga oa faavae mai i fafo i totonu o Samoa ma faapena foi i faaputuga oa faavae i Samoa ona faamauina i fafo.

O lenei foi Tulafono Tau Faaofi o le a faaleaogaina ai po o suiga o so o se malosiaga e faatatau i se faaputuga oa faavae ma le suiga o aiaiga faavae o se faaputuga oa faavae. Lau Afioga o lenei Tulafono Tau Faaofi o le a mafai ona ofoina atu ai ni auunaga e le i mafai ona tatou faia i aso ua mavae, ma ua fauina lea i tulaga foi o le matauina o fesuiaiga o lo o i ai pisinisi faapenei i le lalolagi, aemaise foi le tulaga taufaafefe mai o faalapotopotoga mai fafo i le ono tapunia lea o faiga pisinisi faapenei. Ma o lea ua fua ai lenei Tulafono Tau Faaofi e faavae i aiaiga ma i latou o fitoi ma nei ituaiga pisinisi i le vaavaaia e pei o le Faalapotopotoga lea a le OECD, ia po o le Faalapotopotoga o le atinae o le tamaoaiga o le lalolagi faapea Faalapotopotoga a Asia ma le Pasefika e tetee atu i tupe faaofi mai faasolitulafono, faapea isi Faalapotopotoga faatonotonu o lo o aafia ai i le faagaioioiga o a tatou auunaga ma pisinisi tau tupe faava o Malo.

O le fausia la o lenei Tulafono Tau Faaofi ua uma ona tuuina ai i totonu aiaiga faaletulafono ina ia ogatasi ma tulaga ua siitia ai i luga le vaavaaia ma le pulea o le faatinoina o a tatou galuega faapenei.

Lau Afioga i le Fofoga Fetalai, ua lava tapena lenei Tulafono Tau Faaofi ma ua manaomia ai foi ona toe teuteuina isi Tulafono Tau Faaofi o le a tatou talanoa i ai i se taimi o lenei taeao, ina ia faapena ona ogatasi ma faapena ona faamallosia ma faaleleia atili ai le auunaga a le SIFA ma faatosina mai ai foi pisinisi o lo o fia maua le tatou maketi e pei o tatou i inei mo le faagaluaeina o latou pisinisi.

O le tulaga lau Afioga o lo o i ai, o le faanaunautaiga o le taimi foi e pasia ai e le Palemene lenei Tulafono Tau Faaofi, o le a mafai loa ona faatino. Masalo o Samoa o se tasi lenei o atunuu ua muamua i le faiga leni i le faatuina o le tatou foundation, le tatou Tulafono lea, ina ia mafai ai ona tatou galulue aemaise foi o le tulaga i le taimi leni ua o ese le atunuu o Peretania mai le European Union. Ia ua faapena foi ona saili e i latou nisi jurisdiction o lo o i ai ni Tulafono faapea e malupuipuia ai foi a latou tupe e fia faagaioiina.

O se faapuupuu lea lau Afioga o le faamatalaina o lenei Tulafono Tau Faaofi e tuuina atu i le mamalu o le Palemene mo le talanoaina ma le lagolagoina, faafetai.

FOFOGA FETALAI: Malo faafetai. Ia o le avanoa leni ae se i tulai mai sui usufono aua o lea sa manino le tatou galuega ananafi. Se i tulai mai sui usufono e fia saunoa.

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– faitauga faalua**

Tofa OLO FITI AFOA VAAI: Ia faafetai i lau Afioga i le Fofoga Fetalai. Ou te iloa foi e le toe i ai ni finagalo faalia ae ua ou tulai atu ia e avatu le faafetai ma le faamalo i le Afioga i le Minisita, aemaise foi le Afioga i le Tamaitai Pule ma le mamalu o le Pulega. Faamalo lava galulue. E le fesiligia, o lea auaunaga po o le a foi pisinisi o le tele ia o le sao o le tatou tamaoiga e fesoasoani i le private sector. E ui lava ina tele ai ni faamatalaga foi nei i le tulaga o le aafiaga o tulafono faava o Malo, ae ou te talitonu lava au ia, ou te matuai tatalo atu, faamalosi, ia faamalosi le tatou pisinisi lea aua nai a tatou seleni. Ma e na pau lava nai fautuaga foi lea lau Afioga ma le Matagaluega o a tatou faiva faavae po o policies foi ia ina ia malupuipua le tatou atunuu mai tulaga faaterorisi, faa-criminals ma mea uma lava, aua a oo ina i ai se sasi, e tauvatea uma lava le tatou atunuu ona o le pisinisi faava o Malo. Ia faafetai i lau afioga i le Fofoga Fetalai mo le avanoa.

FOFOGA FETALAI: Malo faafetai. Tulai mai le sui usufono mo Falealili Sasae.

Afioga FUIMAONO TEO SAMUELU TEO (Falealili Sasae): Lau Afioga i le Fofoga Fetalai, e fia faaleoina le agaga o le faafetai. O le ala lea o le tulai atu ona ua manino ma malamalama i le aso ananafi vaega uma sa faaalua e le gata i le Minisita, a o le Tamaitai Pule sa faamalamalamaina le atoaga atoa o le galuega.

E fia faatauaina e lou sui usufono o le vaega lea ou te fiafia i ai. Muamua, o le vaega o le mama faatino o ana galuega faava o Malo, tasi lea vaega sa tuuina mai i le aso ananafi.

O lona lua, o le mautu o lana Faigamalo.

O lona tolu, o le tasi foi o itutino o lea ua faatino ma fuafuaina latou te maketiina ma faalauiloa lenei foi auaunaga i atunuu i fafo.

O le mea lea ou te tulai atu ai e momoli le agaga faafetai tele lava e fai ai au ma sui o le matou uma lava i le aso ananafi ou te iloa foi e le o toe fia saunoa i ai se isi pe toe fetalai i ai aua ua manino mea uma. E momoli atu ai le agaga faafetai tele i lau afioga i le Tamaitai Pule aemaise o le Pulega e tusa ai o le manino ma le lelei o le Lipoti aemaise o le faatinoina o galuega. Ia faamanuia le Atua e tusa ai o galuega o lo o fuafuaina aua le atiaaina o le tatou Malo aua tasi lea Faalapotopotoga o le a fesoasoani malosi mo le atiaaina o le tatou Malo. Faafetai mo le avanoa.

FOFOGA FETALAI: Se i tuu atu le avanoa i le sui usufono mo Anoamaa Sisifo. Tulai mai lau Afioga.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, e puupuu foi se sao o lenei itumalo. E leai foi se manatu e faaumiumia se matou faamatalaga. E momoli atu le faafetai.

**Tulafono Tau Faaofi o Faaputuga Oa Faavae Resitalaina 2016
– faitauga faalua**

O le mea taua i le Faalapotopotoga lenei a le SIFA, o le tauleleia, good reputation. Mo ituaiga galuega faapea mo mea tau offshore, o lo o faatino foi a latou ofisa faapenei, o lona uiga e faatautava le faiga o tatou galuega, a o le tele ia o tupe a le tatou Malo o lo o maua ai, o tupe o le tatou tamaoiaiga.

Ma le isi itu taua o tupe nei a le SIFA, o lea e maitauina, o lo o faaoga ma faasoa atu i a tatou mea tau taaloga. E tele foi tupe i isi atinae eseese o lo o tau atiae itu tau taaloga. E tele foi tupe e fesoasoani i le tatou au lakapi faapea foi le au lakapi taitoafitu. E momoli atu ai le faafetai i lenei itula o le aso i le Afioga i le Taitaifono o le Iuni Lakapi mo le tofiaina o Sir Gordon Tiejens e fai ma tatou faiaoga o le Taitoafitu. E talitonu o se filifiliga fetau foi ma talafeagai, tatou lagolago faatasi lea i le tatou faiaoga ua tofia ua siitia ai foi se isi tulaga maoae ma lelei o le tatou au lakapi taitoafitu pei ona i ai. Ma se i faaee se suafa matai o si toeaina pe a taunuu mai, pe fai foi se isi Lupesoliai pei o le tama o Joseph Parker. Ia o le matou faamatalaga lea, ia manuia le Fono.

FOFOGA FETALAI: Ia tulai mai le sui usufono mo Vaisigano Nu. 1.

Tofa LOPAOO NATANIELU MUA: E momoli atu le agaga faafetai e auala atu i lau Afioga i le Minisita mo le Tulafono Tau Faaofi. E lagolagoina le Tulafono Tau Faaofi, ae faamalulu atu ona e le i lava se taimi ananafi e vaai ai i le Tulafono Tau Faaofi ma le manino. Ae i ai le fesili a le matou itumalo, ua leva ona fai le tatou kamupani lenei, a o lea faatoa aumai le Tulafono lea. O le fesili; po o le a la le Tulafono lea e resitala ai kamupani mai fafo i le taimi nei, po o le mea o le a toe resitala uma kamupani ia i lalo o le Tulafono fou lea? E i ai foi le finagalo sa faaalua ananafi e le Tamaitai Pule o lea e sue se auala e promote ai le itu lea. Ae a silasila a outou afioga, o kamupani trustee lea e resitala mai ai kamupani mai fafo, si a outou tamai fee lava lea e totogi a o le tetele ia o pili a le aualii lena. Fai i ai e fai e latou le promotion ae aua le charge atuina outou. I lou au ia manatu na o au, faaoga outou e fai a outou promotion ma le toe faaalu o nisi seleni o lena e...

Ae momoli atu le agaga faafetai i lau Afioga i le Minisita e tauala atu i le Nofoa, o lenei Tulafono Tau Faaofi matagofie. Faafetai.

FOFOGA FETALAI: Ia se i tulai mai le sui usufono mo Salega Sisifo.

Afioga TOOMATA AKI TUIPEA (Salega Sisifo): Lau Afioga i le Fofoga Fetalai, faafetai mo le avanoa. Ia o le agaga lava o le fia faaalua o le faafetai ma le faamalalo. E muamua ona ou faaleo le agaga fiafia ma le agaga faafetai o lenei itumalo i le Taitai o le Malo lau Afioga i le Palemia aemaise alii ma tamaitai o le Kapeneta, sui usufono mamalu o Sui Minisita, aemaise foi le Paeaiga ua tuanai atu i se tofamamao ma se faautautaga silasila mamau mo le manuia o Samoa na afua ai ona faavae lenei faalapotopotoga. Ou te talitonu o se manuia sa lilo, sa leiloa i lena vaiata, ae ona o le sailiili Malo aemaise foi o le tomai na foai e le Atua i le Afioga i le Palemia aemaise o Minisita ma le Palemene i lena vaiata na faavae ai lenei Faalapotopotoga.

**Tulafono Tau Faaofi o Faaputuga Oa Faavae Resitalaina 2016
– faitauga faalua**

I le maitau a lou sui usufono, o le matua tele o le aoga o lenei Faalapotopotoga, e le gata i le sao mo le atinae o le tamaoaiga o Samoa, aemaise lava o ona sao mo le lima vaivai o faalapotopotoga pei o le faalapotopotoga o taaloga, aemaise lava o le tele o mea ua mafai ona oo i ai le fesoasoani a lenei Faalapotopotoga.

I le talanoaina o le Tulafono ananafi, ua matua manino ma malamalama le auga ma le autu ua mafua ai. Ae na o se fautuaga aua sa vaavaai ma maitau i le Tala o le Tupe a lenei Faalapotopotoga o le matua tele o surplus funds o lo o i ai. Ona tuu atu lea o se fautuaga i lau Afioga i le Palemia faapea le Minisita o Tupe ma le Kapeneta, alolofa ane i pili o nai fanau, e tele alo ma fanau ua le faaauuina a latou aoga i le NUS ona e lima vaivai o latou matua, le lava le tamaoaiga e fesoasoani ai e faaauau ai latou aoga. Ona i ai lea o se fautuaga a Salega Sisifo, faamolemole, se i tagai ane ae a pe a tuu ane sina isi vaega o le latou surplus funds lea e faataatia ane e fesoasoani mo le totogiina o pili o tamaiti aoga ua le gafatia e latou matua ona faaauau ona ua le lava le tamaoaiga.

Ona faapea atu ai lea, ia manuia tele lau Afioga i le Fofoga Fetalai, aemaise foi o le Palemia, le Aiga Kapeneta ma Minisita Lagolago ma le Palemene o Samoa. Ia manuia foi le tapuaiga i Ofisa Sili o Pulega ma Pule Sili o Matagaluega ma Faalapotopotoga a le Malo, aemaise foi sui usufono ua mafai ona tatou faatasi i lenei aso e molimauina taualumaga o lenei Fonotaga. Ma lou faaloalo lava. Faafetai.

FOFOGA FETALAI: Faafetai. Ia se i tulai mai le Minisita pe i ai nisi... O fia saunoa Faleata? E leai, o lau Afioga o le Sui Minisita, o mea lava e fai e le Kapeneta, o le Sui Minisita foi lena.

Tulai mai le Afioga i le Minisita o Tupe aua e leai se mea tele na o le faafetai lea e momoli mai e sui usufono mamalu.

Afioga Hon SILI EPA TUIOTI: Faafetai i lau Afioga i le Fofoga Fetalai faapea foi sui usufono mamalu o le Palemene sa saunoa i le tatou Tulafono Tau Faaofi. O le talitonuga foi lena o le tatou Faalapotopotoga lenei o le SIFA, o le tasi lenei o tatou Faalapotopotoga e matua tele naua lona sao i le tatou Malo, e le gata o tupe o lo o fesoasoani i le faatupeina o le tatou Tala o le Tupe mai lea tausaga i lea tausaga, ae o le tele foi o vaegatupe o lo o faamatuu atu e le Pule Sili ma le Komiti Faatonu e lagolago ai, e le gata i le tatou Lakapi i le Manu Samoa 15 ma le Toafitu, ae faapena foi le fesoasoani tele i le Toa Samoa le Rugby League, ma isi foi Faalapotopotoga faapena. Masalo ana leai se SIFA, e le mafai ona tatou lagolago i le atiaeina, e le gata o nisi o tatou fuafuaga taua o le atunuu, aemaise lava i tulaga ia tau taaloga.

E pei ona silafia, e pei o le tausaga 2014 e \$17miliona le tupe mama a le SIFA, ma e faafetai foi i le finagalo faaalua, o le lelei faatino ma le amanaia foi o le tatou faalapotopotoga i fafo ona o le tulaga mama ma le lava tapena i tulaga tau Tulafono e proactive, e tele foi taimi e mafai ai ona o atu le Pule Sili ma le Komiti Faatonu ma nisi o Ofisa Sinia, e o lava i faalapotopotoga ia lea e fai ma vaavavai mai po o sao ma lelei le faatinoina.

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– faitauga faalua**

O avanoa na e faatalanoa ai foi po o malamalama latou i a tatou galuega ma tulafono e fesoasoani ai i le tulaga o le faatosina atili mai o atunuu ia ia i tatou ona o le tulaga o le political stability, po o le tulaga foi o le atinae o le tatou tamaoaiga ma le tulaga o lo o i ai a tatou Tulafono ma tulaga faapena.

Ia atonu o lo o faafofoga mai le Taitaifono ma le Komiti Faatonu o le SIFA i nisi vaega e mafai ona fesoasoani atu ai le faalapotopotoga. Atonu i le tulaga tau aoga, e tele nisi fesoasoani mai ia Niu Sila, Ausetalia ma i latou o lo o latou o atu i tulaga na o aoaoga, a o se mea e mafai lava ona toe tagatagai i ai, e le gata i le tulaga o aoga, a o le tulaga foi i le atiaaina o nuu ma alaafaga i tua ma le tulaga tau soifua maloloina. Aua e le o po se lilo i le naunau lava e faaleleia atili ma siitia i luga le tulaga o le soifua maloloina, aemaise lava i tua, atonu o nisi na o auala e fesoasoani atu ai le tatou faalapotopotoga.

Na fesiligia le tulaga foi lea pe toe resitala kamupani, o le taimi nei, e leai. E pei ona ou taua, o le tulafono lea o se auaunaga fou o le a mafai ai ona faatino nisi auaunaga fou e le i faatinoina i le taimi nei. O le taimi nei e 38,000 tatou kamupani o lo o resitala ia i tatou e USD\$300 i le tausaga e totogi. O lo o tele lava le avanoa e toe faateleina ai, e pei o le faaitaiga na faafofoga i ai i le aso ananafi o le nuu foi lea o British Virgin Island e 500,000 le aofai o kamupani la e resitala ai. Atonu la o le teuteuga o le tatou Tulafono Tau Faaofi fou lea ma toe tetueu ai isi tatou Tulafono lea o le a tatou talanoa i ai, o le a faapena ona fesoasoani tele ina ia atili faaleleia atili le tatou auaunaga ma faapena ona faatele mai ai nisi pisinisi fou. Ae faafetai tele mo saunoaga, faafetai.

FOFOGA FETALAI: Malo faafetai. Faafetai foi i saunoaga o sui usufono mamalu e ala foi i a latou fautuaga ma le agaga faafetai ma le faamalo.

Na faamaonia le lafo ma faitauina le Tulafono Tau Faaofi o Faaputuga Oa Faavae Resitalaina 2016 i lona faitauga faalua.

**TULAFONO TAU FAAOFI O TEUTEUGA O LE TULAFONO O
MAVAEGA TAUSI 2016 – faitauga faalua**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Mavaega Tausi 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Faamasinoga ma Pulega Tau Faamasinoga, Minisita mo Tina ma Tamaitai, Atinae o Nuu, Afioga ma Agafesootai, ma le Minisita mo Tupe Maua.

FOFOGA FETALAI: O le avanoa leni e saunoa ai lau Afioga.

18 OKETOPA 2016

**Tulafono Tau Faaofi o Teuteuga o le Tulafono o Mavaega Tausi 2016
– faitauga faalua**

Afioga Hon SILI EPA TUIOTI: Faafetai i lau Afioga i le Fofoga Fetalai. E pei ona ou taua o Tulafono ia toe teuteu e i ai le Tulafono lea ma le isi Tulafono, e tataua ona o faatasi ma le tatou Tulafono na tatou talanoaina muamua. O le sini autu lava o le taumafai o le Tulafono Tau Faaofi e teuteu le Tulafono o Mavaega, ma o sini autu o lenei Tulafono Tau Faaofi, ia toe faamanino le faamatalaina o le uiga o upu; *õmavaega tausì i atunuu i fafo e faamanuia ai,*” ina ia aveese ai le fuaitau; *õtagatanuu o Samoa.* ò Afai ua avea lea tagata ma tagata nofomau i Samoa o le a noatia o ia i tulaga o le totogiina o lafoga i totonu o le tatou atunuu.

O lona lua, ia faaofi le fuaiupu 51(a) fou, ina ia aofia ai se aiaiga lea e faasino i nisi meatotino faaopoopo i se faatulagaga o mavaega tausì faapitoa faavaomalo i Samoa ua taua lea o le SISTA.

O lona tolu, ia teuteu le fuaiupu 63 o le Tulafono Autu e aiaia ai le tuufaatasia o mavaega tausì o i ai faiga faapaaga faatapulaaina.

Ia ma lona fa, ia teuteu le fuaiupu 80(2) o le Tulafono Autu e faailoa ai nisi tulaga faapitoa ma afai ua lelei faatino ma ua tusa ai ma le Tulafono se talosaga mo faamatalaga e tusa ai o se feagaiga tau lafoga faaluaina. Po o se feagaiga o le fetufaaiga o faamatalaga tau lafoga, o lona uiga, i le noatia ma le fai fuafua o aiaiga o le DTA po o le faamatalaga tau lafoga lea ia ma le feagaiga tau lafoga faaluaina e ao ona tuuina atu i ai ia faamatalaga, ma le faaaloalo lava.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Mavaega Tausì 2016 i lona faitauga faalua.

FOFOGA FETALAI: Malo faafetai. Ua tatou toai taunuu mai i le tatou malologa masani. O le a faataatiaese Taualumaga a le Fono Aoao mo lana malologa masani.

Na faataatiaese Taualumaga a le Fono Aoao mo lana malologa masani i le itula 10.45 i le taeao ma toe faaauau i le itula e 11.25 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Faa Paaga Faatapulaaina 2016.

FOFOGA FETALAI: E faasilasila atu ua toe amatalia Taualumaga ma galuega a le Fono Aoao Faitulafono. Ua ou manatu ua maua le malosi faafouina o le Palemene e faaauau ai le tatou galuega seia tatou toai taunuu i le mutaaga o galuega fai ma fuafuaga faataitia mo le tatou fonotaga. E faia le tatou malologa ua tatou see mai i le numera 8 o le tatou galuega.

18 OKETOPA 2016

**TULAFONO TAU FAAOFI O TEUTEUGA O LE TULAFONO O
FAIGA FAA PAAGA FAAVA O MALO MA FAIGA FAA PAAGA
FAATAPULAAINA 2016 – faitauga faalua**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Faa Paaga Faatapulaaaina 2016 i lona faitauga faalua ma ou te fia tautala faamalamalama i ai.*

Faaluaina e le Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu, Afioga ma Agafesootai.

FOFOGA FETALAI: Ou te tapa lau Afioga i le Minisita mo lau saunoaga faamalamalama.

Afioga Hon SILI EPA TUIOTI: Lau Afioga i le Fofoga Fetalai e pei ona taua muamua o lenei Tulafono Tau Faaofi o Teuteuga o le Tulafono lea, e o faatasi lava ma le Tulafono e lua ia na tatou talanoaina i le taeao nei. O lenei Tulafono Tau Faaofi, ia o le sini autu lava o le taumafai lea ina ia toe teuteuina le Tulafono o Faiga Faa Paaga Faava o Malo ma Faiga Faapaaga Faatapulaaaina 1998 ina ia aiaia ai mo le faaaogaina o Faiga Faa Paaga Faatapulaaaina e tagata sa nofomau i Samoa. Ma ia aiaia ai foi mo le faaaogaina o Faiga Faa Paaga Faava o Malo ma Faiga Faa Paaga Faatapulaaaina mo pisinisi ma tupe e teufaafaigaluegaina. Ia ma le lona tolu, ia mafai ai ona aiaia mo le faaaogaina o gagana po o igoa o tagata mai fafo i igoa o latou kamupani, ma le faaaloalo lava.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Faa Paaga Faatapulaaaina 2016 i lona faitauga faalua.

**TULAFONO TAU FAAOFI O FAAPUTUGA OA FAAVAE
RESITALAINA 2016 – iloiloga auiliili**

FOFOGA FETALAI: E tusa ai ma le Tulafono Tumau e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Amataga ma le resitalaina.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 4: Feagaiga Tusitusia.

Faamaonia.

FUAIUPU 5: Tulafono Faafoe.

Faamaonia.

FUAIUPU 6: Tagata e feagai ma meatotino.

Faamaonia.

FUAIUPU 7: Faamoemoega.

Faamaonia.

FUAIUPU 8: Faailoga vaaia faapitoa o se faaputuga oa faavae.

Faamaonia.

FUAIUPU 9: Fono.

FOFOGA FETALAI: Tulai mai lau Afioga i le Palemia o le Taitai o le Malo.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA DR. SAILELE MALIELEGAOI: Lau Afioga i le Fofoga Fetalai, o le fesoasoani atu i sui usufono, ina ia faafogafoga mai le atunuu o lea e tumu le tatou Maota nei, pe mafai lava ona ou fautuaina sui usufono se i Ioe mai leotele po o le Leai foi?

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FOFOGA FETALAI: E manaia le fautuaga, e manatu ona o la e tapuai mai le atunuu, ne i faapea ai ua fai pitotasi le tatou galuega. Ae e leai o lea lava e maua atu o outou siufofoga, ae se i tau tuutuu ae i luga faamolemole mo le faafofoga mai o le tatou atunuu.

Faamaonia le Fuaiupu 9.

FUAIUPU 10: Tagata e vaavaaia.

Faamaonia.

FUAIUPU 11: Tagata e puipuia aia.

Faamaonia.

FUAIUPU 12: Sooupu nofomau.

Faamaonia.

FUAIUPU 13: Faamaapeina i se tulaga faatoga fiti.

Faamaonia.

FUAIUPU 14: Resitalaina, faavaeina ma mataupu faaopopo.

Faamaonia.

FUAIUPU 15: Tagata na faavaeina se faaputuga oa faavae.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 16: O isi fesoasoani faameaalofa.

Faamaonia.

FUAIUPU 17: Tagata e faamanuiaina ai.

Faamaonia.

FUAIUPU 18: Tagata faamanuiaina e tatau ona logo.

Faamaonia.

FUAIUPU 19: Tagata faamanuiaina e lē tau logoina.

Faamaonia.

FUAIUPU 20: Aiatatau a tagata faamanuiaina.

Faamaonia.

FUAIUPU 21: Maliega e tuueseina ai faamanuiaga e agavaa i ai.

Faamaonia.

FUAIUPU 22: O faamanuiaga i ituaiga.

Faamaonia.

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 23: Tagata ofisa aloaia faaopoopo pe afai o itiiti ifo i lo le aofaiga manaomia.

Faamaonia.

FUAIUPU 24: Sui fou po o sui faaopoopo pe afai ua leai se aiaiga manino

Faamaonia.

FUAIUPU 25: Faamavaega po o le aveesea o sui.

Faamaonia.

FUAIUPU 26: Tofiaina o tagata fou e puipuia aia pe afai e leai ni aiaiga o faaalua.

Faamaonia.

FUAIUPU 27: Faamavaega po o le aveesea o le tagata e puipuia aia.

Faamaonia.

FUAIUPU 28: Tofiaina o tagata fou e vaavaaia pe afai e leai ni aiaiga o faaalua.

Faamaonia.

FUAIUPU 29: Faamavaega po o le aveesea o ni tagata o vaavaaia.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 30: Tiute masani o tagata ofisa.

Faamaonia.

FUAIUPU 31: Tiute tauave faapitoa o le fonu.

Faamaonia.

FUAIUPU 32: Malosiaga faapitoa o le fonu.

Faamaonia.

FUAIUPU 33: Tiute faapitoa o tagata e vaavaaia.

Faamaonia.

FUAIUPU 34: Malosiaga faapitoa o tagata o vaavaaia.

Faamaonia.

FUAIUPU 35: Tiute tauave faapitoa o tagata o puipuia aia.

Faamaonia.

FUAIUPU 36: Malosiaga faapitoa o tagata e puipuia aia.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 37: Aua le galue i le tofi mo se tau.

Faamaonia.

FUAIUPU 38: O le tiute tauave le tuina atu o faamatalaga.

Faamaonia.

FUAIUPU 39: O le tiute tauave le teuina ma le tausia o faamaumauga.

Faamaonia.

FUAIUPU 40: O le tiute tauave o sui le galulue faatasi.

Faamaonia.

FUAIUPU 41: Lē faaituau o sui.

Faamaonia.

FUAIUPU 42: Malosiaga tuina atu e le fono.

Faamaonia.

FUAIUPU 43: Sui ua faamauina faaletulafono.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 44: E lē faailoaina atu felafolafoaiga.

Faamaonia.

FUAIUPU 45: Noataga mo le soliga o tiute tauave.

Faamaonia.

FUAIUPU 46: Malosiaga e tuuina atu ai se faamama avega i tagata ofisa mai noataga tau i le tagata lava ia.

Faamaonia.

FUAIUPU 47: Puleaga faa-faamasinoga.

Faamaonia.

FUAIUPU 48: Faaaogāina o Tulafono a Samoa i mataupu tau tulaga aloaia.

Faamaonia.

FUAIUPU 49: Faamaoniga o feuiaiga faapitoa faapisinisi.

Faamaonia.

FUAIUPU 50: Faauiuga a le Faamasinoga e faia faasaga i tagata ofisa aloaia.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 51: Talosaga mo faatonuga.

Faamaonia.

FUAIUPU 52: Malosiaga lautele o le Faamasinoga.

Faamaonia.

FUAIUPU 53: Malosiaga o le Faamasinoga mo le lē usitaia o poloaiga.

Faamaonia.

FUAIUPU 54: Totogiina o Tupe.

Faamaonia.

FUAIUPU 55: Faamatalaga sese pe tau faasese.

Faamaonia.

FUAIUPU 56: O isi soligatulafono ma faasalaga.

Faamaonia.

FUAIUPU 57: O le ave a o faaputuga oa mai fafo ma faaputuga oa faavae a Samoa.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 58: E ao ona faatagaina ona resitalaina e tulafono a se isi atunuu.

Faamaonia.

FUAIUPU 59: Faasaina mai le resitalaina.

Faamaonia.

FUAIUPU 60: Talosaga.

Faamaonia.

FUAIUPU 61: Aloaia o le resitalaina.

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: E faamalulu atu i lau Afioga ona o lena foi e... pei e manaia le sau tai tolu tai fa e le faatonua lau Afioga i a tatou fuaiupu ou te alofa ia oe i lau galuega, ma le faaaloalo lava.

FOFOGA FETALAI: Malo. Ia ona o lea ua e aiaina le galuega a le Fofoga Fetalai, ou te le iloa po o se fiapoto po o se... ae i ai mafuaaga e ala ai ona ou le ta faatasia e pei o le tulaga lea ona o Faamaumauga a le Ofisa, ae eseese foi, aua e ese le fuaiupu ese lona faamatalaina, e pei o le tulaga lea. Ae lafo mai pea lau galuega, a e lelava ona e tulai ese lea ma le tatou Fono, faafetai lava.

Tofa LEALAILEPULE RIMONI AIAFI: Lau Afioga, pei ua maoae lau saunoaga o le fiapoto, leaga o le mea lea sa i ai foi talu ai, o le mea na o se tuualalo, ae leai se mea o le a e faalii ai. Ae ou te le aiaina lau galuega, ae o le mea lea sa tatou sau ai foi i le Paeaiga talu ai, ma le faaaloalo lava, ae aua e te mateletele ua iloa ua e matua.

FOFOGA FETALAI: Malie foi le sui usufono, aua e pei a sela le tagata ae faatei, ia e pei o le upu lena. Ae ui i lea, malie le uso. Ia ana e le faalavelave ua uma le isi itulau lea. Ia, faafetai.

Faamaonia le Fuaiupu 61.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 62: Faalēaogāina o le resitalaina.

Faamaonia.

FUAIUPU 63: Aveese o le resitalaina.

Faamaonia.

FUAIUPU 64: Aveeseina o le igoa mai le Tusi Resitala pe afai o aiaia i le faavae.

Faamaonia.

FUAIUPU 65: O isi mafuaaga mo le lē aveeseina o le igoa mai le Tusi Resitala.

Faamaonia.

FUAIUPU 66: Faasilasilaga e tuuina atu ai i tagata o nofo aitalafu ai i le faaputuga oa faavae ma tagata auai a o lumanai ai le aveeseina o le igoa.

Faamaonia.

FUAIUPU 67: Talosaga mo le aveeseina o le igoa mai le Tusi Resitala.

Faamaonia.

FUAIUPU 68: Aloaia o le aveeseina o le igoa.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auilili**

FUAIUPU 69: Faalēaogāina o le aveeseina o le igoa.

Faamaonia.

FUAIUPU 70: Malosiaga o le Faamasinoga e aveeseina ai le igoa mai le Tusi Resitala.

Faamaonia.

FUAIUPU 71: Tautinoga o le tausisia.

Faamaonia.

FUAIUPU 72: O pepa aloaia o lo o tusia i se isi gagana e ese ai nai lo le gagana faa-Peretania.

Faamaonia.

FUAIUPU 73: E lē aafia le faaauau pea ona i ai o le faaputuga oa faavae i lona resitalaina po o le faaliliuina atu.

Faamaonia.

FUAIUPU 74: Faaaogaina o upu ma fuaitau i se isi atunuu.

Faamaonia.

FUAIUPU 75: Teuteuga fetuunaiga o malosiaga.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 76: Teuteuga e faia e le Faamasinoga.

Faamaonia.

FUAIUPU 77: Faamaapeina ma le faamutaina.

Faamaonia.

FUAIUPU 78: Tagata aloaia e faamaapeina.

Faamaonia.

FUAIUPU 79: Faamaapeina i luga o tulaga e faamaapeina ai e le fonu.

Faamaonia.

FUAIUPU 80: Faamaapeina i luga o tulaga e faamaapeina ai e le Faamasinoga.

Faamaonia.

FUAIUPU 81: Aiaiga lautele e faasino i le faamaapeina.

Faamaonia.

FUAIUPU 82: Faamatalaga o mataupu ma lipoti a tagata e faamaapeina meatotino ma le fonu.

Faamaonia.

18 OKETOPA 2016

**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FUAIUPU 83: O tagata e faamaapeina meatotino.

Faamaonia.

FUAIUPU 84: O nisi mataupu lautele agai i le faamaapeina o meatotino.

Faamaonia.

FUAIUPU 85: Noataga faale-tagata mo nisi tulaga faaletonu i le tuanai ai o le gaumativa.

Faamaonia.

FUAIUPU 86: Tufatufaga o meatotino ina ua faamaapeina le faaputuga oa faavae.

Faamaonia.

FUAIUPU 87: Aveesea mai le Tusi Resitala.

Faamaonia.

FUAIUPU 88: Toe faaaauuina o le faaputuga oa faavae i le tuanai ai o le poloaiga na faamaapeina ai.

Faamaonia.

FUAIUPU 89: O Tulafono Faatonutonu ma pepa faatumu.

Faamaonia.

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– iloiloga auiliili****FUAIUPU 90: Faasalaga.***Faamaonia.***FUAIUPU 91: Ua teuteuina le Tulafono o Lafoga o Tupe Maua.****Tofa LEALAILEPULE RIMONI AIAFI:** Lau Afioga i le Fofoga Fetalai....**FOFOGA FETALAI:** Tulai mai le sui usufono mo Faleata Sisifo.**Tofa LEALAILEPULE RIMONI AIAFI:** E faamalulu atu foi... O le mea e fai ma totoe le tatou Fono. O le Fuaiupu lea e 91, leaga o lea e foliga mai o lea ua i ai le fautuaga ina ia suia le Tulafono o le Income Tax. Sa masani la ona aumai ai ma le suiga lea ina ia o faatasi ma le suiga o le Tulafono fou. O lea ua fautua mai e sui, ae le o aumaia se fautuaga mo le suiga o le Income Tax ina ia ogatasi ma le suiga o le Tulafono lea. O le fesili atu lea ma le faaaloalo lava.**FOFOGA FETALAI:** Malo. Se i saunoa mai lau Afioga i le Minisita o Tupe.**Afioga Hon SILI EPA TUIOTI:** Lau Afioga i le Fofoga Fetalai ma le tatou Fonotaga i leni taeao, e pei ona silafia o tatou auaunaga nei i tatou Tulafono uma o lo o i ai e faapito lava mo tagata foi nei o lo o nonofo i fafo e i ai a latou tupe o lo o aumaia ia i tatou e faafaigaluegaina ai. Ma o le tulaga lava o i ai e le totogia ni tulaga tau income tax. Ma o le tulaga foi lena e i ai ina ia atoa lelei ai le vaega o le Tulafono Tau Faaofi lea, o foundations po o faavae nei e fuafua i ai e le i i ai ni o tatou tagata e faaautu i tagata i fafo e aumai a latou tupe e faaaogaina ai, ma e exempt mai le tulaga o le totogiina o lafoga e pei ona i ai isi a tatou Tulafono lea na teuteuina i le taeao nei.**FOFOGA FETALAI:** Malo faafetai. Tulai mai le sui usufono.**Tofa LEALAILEPULE RIMONI AIAFI:** O lea ua maua atu le mea lea e saunoa i ai le Afioga i le Minisita, e le o aafia tatou ae peitai ane o le Fuaiupu 91 o le Tulafono Tau Faaofi lea, e pei o le uiga o lau fautuaga lau Afioga, ina ia tataua ona atagia i totonu o le Tulafono o le Income Tax 2012 se suiga talafeagai ina ia mafai ona faaaogaina. Aua a tatou pasiaina le Tulafono Tau Faaofi leni, e le mafai lava ona faaaogaina le vaega lea o le Tulafono o le Income Tax, se i vagana ua toe aumai e fai se suiga i le Palemene e pei o aga masani. Ma le faaaloalo lava.

18 OKETOPA 2016**Tulafono Tau Faaofi o Faaputuga Oa Faavae Resitalaina 2016
– iloiloga auiliili**

FOFOGA FETALAI: Malo faafetai. Se i vagana pe i ai se isi mea, a o lea ua manino o le fautuaga, e aoga foi le fautuaga e tutupu ai matagi i liu o vaa i le finagalo o le Malo mo le lumanai, ae afai e leai, o le a faaauau le tatou galuega.

Faamaonia le Fuaiupu 91.

FAAMATALAGA:

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Faaputuga Oa Faavae Faamauina 2016.

Faamaonia.

Na faagasolo le Tulafono Tau Faaofi o Faaputuga Oa Faavae Faamauina 2016 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
MAVAEGA TAUSI 2016 – iloiloga auiliili**

FOFOGA FETALAI: E tusa ai ma Tulafono Tumau, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua faaofiina le fuaiupu 51A fou.

Faamaonia.

18 OKETOPA 2016

**Tulafono Tau Faaofi o Teuteuga o le Tulafono o Mavaega Tausi 2016
– iloiloga auiliili**

FUAIUPU 4: Ua suia le fuaiupu 63.

Faamaonia.

FUAIUPU 5: Ua teuteuina le fuaiupu 80.

Faamaonia.

FUAIUPU 6: Ua faaofiina le fuaiupu 80A fou.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Mavaega Tausi 2016.

Faamaonia.

Na faagasolo le Tulafono Tau Faaofi o Teuteuga o le Tulafono o Mavaega Tausi 2016 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
FAIGA FAA PAAGA FAAVA O MALO MA FAIGA FAA PAAGA
FAATAPULAAINA 2016 – iloiloga auiliili**

FOFOGA FETALAI: E tusa ai ma Tulafono Tumau e amata le Iloiloga Auiliili o le Tulafono Tau Faaofi i le fuaiupu 2.

FUAIUPU 2: Ua teuteuina le fuaiupu 2.

Faamaonia.

18 OKETOPA 2016

**Tulafono Tau Faaofi o Teuteuga o le Tulafono o Faiga Faa Paaga Faava
o Malo ma Faiga Faa Paaga Faatapulaaina 2016 – iloiloga auiliili**

FUAIUPU 3: Ua teuteuina le fuaiupu 5.

Faamaonia.

FUAIUPU 4: Ua suia le fuaiupu 8.

Faamaonia.

FUAIUPU 5: Ua teuteuina le fuaiupu 17.

Faamaonia.

FUAIUPU 6: Ua teuteuina le fuaiupu 19.

Faamaonia.

FUAIUPU 7: Ua suia le fuaiupu 21.

Faamaonia.

FUAIUPU 8: Ua teuteuina le fuaiupu 23.

Faamaonia.

FUAIUPU 9: Ua teuteuina le fuaiupu 28.

Faamaonia.

FUAIUPU 10: Ua teuteuina le fuaiupu 29.

Faamaonia.

18 OKETOPA 2016

**Tulafono Tau Faaofi o Teuteuga o le Tulafono o Faiga Faa Paaga Faava
o Malo ma Faiga Faa Paaga Faatapulaaina 2016 – iloiloga auilili**

FUAIUPU 11: Ua suia le fuaiupu 36.

Faamaonia.

FUAIUPU 12: Ua soloia fuaiupu 37 ma le 38.

Faamaonia.

FUAIUPU 13: Ua teuteuina le fuaiupu 39.

Faamaonia.

FUAIUPU 14: Ua teuteuina le fuaiupu 41.

Faamaonia.

FUAIUPU 15: Teuteuga faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

**IGOA: Teuteuga o le Tulafono o Faiga Faa Paaga Faava o Malo
ma Faiga Faa Paaga Faatapulaaina 2016.**

Faamaonia.

*Na faagasolo le Tulafono Tau Faaofi o Teuteuga o le Tulafono o Faiga Faa
Paaga Faava o Malo ma Faiga Faa Paaga Faatapulaaina 2016 e aunoa ma
se Teuteuga.*

18 OKETOPA 2016**TULAFONO TAU FAAOFI O FAAPUTUGA OA FAAVAE
FAAMAUINA 2016 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faaputuga Oa Faavae Faamauina 2016 i lona faitauga faatolu.*

Faaluaina e le Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

**TULAFONO TAU FAAOFI O TEUTEUGA O LE TULAFONO O
MAVAEGA TAUSI 2016 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Mavaega Tausi 2016 i lona faitauga faatolu.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Faamasinoga ma Pulega Tau Faamasinoga ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

**TULAFONO TAU FAAOFI O TEUTEUGA O LE TULAFONO O
FAIGA FAA PAAGA FAAVA O MALO MA FAIGA FAA PAAGA
FAATAPULAAINA 2016 – faitauga faatolu**

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Faa Paaga Faava o Malo ma Faiga Faa Paaga Faatapulaaaina 2016 i lona faitauga faatolu.*

Faaluaina e le Minisita mo Faamasinoga ma Pulega Tau Faamasinoga, Minisita mo Tupe Maua ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faitulafono.

FOFOGA FETALAI: Ua faamalo galulue i le tatou galuega i lenei aso. Ou te tapa lau Afioga i le Palemia.

18 OKETOPA 2016

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA DR. SAILELE MALIELEGAOI: Lau Afioga i le Fofoga Fetalai, ou te tulai atu e momoli atu le faamalo i lau Afioga i le taitaiga o le tatou Fonotaga aemaise foi o le mamalu o le Maota nei, ua tele nei Tulafono ua tatou tagofia i leni taeao. O galuega sa faatino i leni taeao pe a fua i tulaga masani o Palemene i le 20 tausaga ua mavae atu, e tusa le galuega leni o le aso e tasi ma vaiaso e ono e pei ona masani ai i aso la i le vave, ae le gata i lena a o le tele o le malamalama lea e tulai mai i a outou Afioga i sui usufono o le Palemene leni, aemaise foi le tulaga ua faatino ai a tatou galuega i le muai tagofia o Tulafono nei i fafo atu o le Maota e faatalanoa muamua a o le i aumaia i totonu o le Maota. O le mea lea e momoli atu ai le faamalo tele i a outou Afioga i sui usufono o le tatou Maota nei.

Ma ou te faatu atu ai le lafo, *Ina ia tolopo nei Taulumaga a le tatou Fono Aoa seia aulia le Aso Lua, 20 Tesema 2016 e tusa ai ma le Polokalame o Aso Fono.*

Faaluaina e le Minisita mo Galuega, Felauaiga ma Atinae Eeseese ma le Minisita mo Tupe Maua.

Na faamaonia le lafo.

ISI FAASILASILAGA A LE FOFOGA FETALAI

FOFOGA FETALAI: Faafetai. Ae tatou te le i tolopo, ou te toe faamanatu atu galuega a le Komiti Faa-Palemene, se i tautuana le tele o tatou galuega ina ia faapena ona faatino. Faafetai foi ona o nisi o galuega ua maea ona lipoti mai. Malo faafetai fai o le faiva.

O le lagona lava e tasi o le agaga faafetai ona ua maea le tatou galuega sa fuafuaina mo le tauaofiaga leni a le tatou Palemene. E momoli atu foi le faafetai ma le faamalo i la outou lagolago mai, e le faigofie le galuega, a o le tatou galulue faatasi tatou te taunuu ai i mea sili ona lelei aua le faafofoga tapuai mai a le atunuu.

Ou te faamalulu atu foi, o le a foi se upu ua faapena onaopotua i le tatou va feagai ai, o lagona ina ia faapena ona tatou galulue aua mea sili mo le faafofoga tapuai mai a Samoa aemaise o le lumanai o le atunuu.

Ae tatou te le i tolopo e tusa ai o le lafo e pei ona faatulai mai e le Palemia, ou te tapa lau Afioga i le sui usufono mo Faleata Sisifo e te faaiuina mai le tatou Fonotaga i se tatalo.

Na tolopo Taulumaga a le Fono Aoa i le itula e 12:26 i le aoauli seia aulia le itula e 9:00 i le taeao o le Aso Lua, 20 Tesema 2016.